

Pcd refusa l'iniziativa da linguas estras en scola

Radunanza da delegadas e delegads da la pcd grischuna a Salouf en Surmeir

■ **Delegadas e delegads da la pcd grischuna ha decidì la parola na per l'iniziativa da linguas, dentant probabel main cler che spetgà. Pli evidentas èn las ulteriuras parolas tar las votaziuns federalas stadas.** La pcd grischuna è sa radunada en il vitg idilic da Salouf che tutga dapi la fusiun da l'onn 2016 tar la vischnanca da Surses. Il vicepresident communal *Gian Sonder* è sa legrà d'astgar beneventar ils delegads en la halla plurivalenta ed ha skizzà in maletg detg positiv da la vischnanca fusiunada ch'è cun l'agricultura, il turissem e «ses dus Giovanni» – Giovanni Segantini e la «locomotiva *Giovanni Netzer* – culturalmain da gronda impurtanza e ch'irradiescha or en tut il mund.

Reacquistà la segunda sutga en la regenza grischuna

En sia allocuziun d'avertura ha il president, cusseglier dals chantuns *Stefan Engler*, dà in sguard sin las elecziuns che han gè success ed han reconquistà suenter 20 onns puspè ina segunda sutga en la regenza. Cun quest success sajan colliadas «la schanza e la responsabladad» da metter accents essenzials en l'avegnir da noss chantun. En il center da questa delegada stettia l'iniziativa «Mo duas linguas estras en scola primara» che saja d'eminenta impurtanza per il Grischun sco chantun triling e che saja vegnida approvada da regenza e parlament cun 93:17 vuschs.



Ina viva debatta

Ils differents arguments e las differentas posiziuns èn s'articulads en ina viva discussiun ch'è vegnida manada da la schurnalista *Monika Werder* suenter ils referats da *Luzi Jöhri*, l'iniziant da l'iniziativa da linguas estras e da deputà *Ilario Bondolfi*, il parsura dal comité contra l'iniziativa. Per il magister *Luzi Jöhri* ha l'iniziativa «mo ina lingua estra en scola primara» da

s'engaschar per il bainstar dals uffants ed el saja satisfatg ch'il pievel grischun possa decider ils 23 da settember davart questa fatschenta. Sin quest stgalim sajan ils scolars surdumandads cun pliras linguas estras e cunzunt pateschia uschia la lingua materna. Per *Ilario Bondolfi* disegna *Jöhri* in maletg memia stgir da la veta en scola. I na dettia nagin studi che confermia ch'ils scolars sajan surdumandads, anzi, che quels emprendian tutta-

via pli levamain ulteriuras linguas estras. Cuzunt saja dentant l'aboliziun da l'instrucziun da talian en las scolas tudestgas «inacceptabla». Il talian tutgia tar la cultura da noss chantun «sco il capricorn en il voppen». El taxescha l'iniziativa sco in culp frontal sin la trilinguitad da noss chantun. Il lamento d'esser surdumandà derivia mo da regiuns linguisticas tudestgas e betg da las cuntradas italofofas. Cun l'iniziativa perdia il chantun «la pli-

valur da la trilinguitad». Ils delegads han votà a scrit ed igl èn sa resultads 37 na, 12 gea per l'iniziativa e sis abstenziuns. Cun quai saja radund la mesadad dals delegads s'exprimida cleramain cunter l'iniziativa. *Jöhri* ha ditg ch'el saja positivamain surstà da quest resultat.

In na a las iniziativas extremas

Pli cleras èn las decisiuns stadas tar ils dus projects da lescha federala che vegnan en votaziun ils 23 da settember. *Gian Sonder* ha recumandà – era sch'ella sajan tuttavia dispitaivlas en circuls agrars – ord atgna vista ed experientscha da votar duas giadas na a «questas iniziativas extremas» che portian la finala mo «dapli birocracia» e pretschs pli auts.

Tar l'iniziativa dal pievel «per vivonda favuraivla a l'ambient e producida a moda faira (iniziativa Fair Food) han delegadas e delegads da la Partida cristiandemocratica grischuna prendì per gronda part la parola na per l'iniziativa «per ina suverantad dal provediment dal pievel cun victualias, l'agricultura va tiers a nus tuts» è vegnida refusada unanimamain.

In gea recumonda la Partida cristiandemocratica dal Grischun dentant tar il conclud federal davart vias da velo e davart access public da vias e sendas da viandar. Tant la votaziun chantunala sco la votaziun federala han lieu ils 23 da settember.

Claudio Willi/mc

Viva debatta davart l'iniziativa da linguas estras en scola tranter l'iniziant *Luzi Jöhri* (a dre-tga) ed *Ilario Bondolfi* (a san). Mainadiscussiun *Monika Werder*.

FOTO Y-BÜRKL